

Lacus.

Flumina.

Nunc ordo & methodus nostra postulat, ut Lotaringiæ suos amnes clariores demus, paucula de Lacubus præmittentes. Stagna habet piscosa & Lacus. Inter quos memoratur ille, cujus ambitus est quatuordecim milliarium, in quo Carpiones insolitæ magnitudinis, trium videlicet pedum: saporis vero adeo grati, ut aliarum regionum carpiones suavitate multo superent. Ex hujus Lacus piscatione tertio quoque anno Dux Lotaringiæ sedecim percipit Francorum millia. Fluminibus irrigatur celeberrimis *Mosa*, *Mosella*, *Saravo*, *Voloia*, *Mortana*, *Murra*, *Sella*, *Hida*, & aliis. De *Mosa* ad Inferiorem Germaniam. Reliqui ad hunc Ducatum proprie pertinent: *Mosella* quidem & *Saravus* potiore parte; ceteri fere integri. Oritur *Mosella* in monte Vogeso, haud procul Araris fontibus, paullo supra Vicum, qui vulgo *Bussan*: lapsusque ab Vulturno ad Caurum, perlustratis Opidis, qui vernacule *l'Estrais*, *Remiremont*, *Espinal*, *Charmes*, *Baton*, flexoque ab Oriente in Occidentem cursu, recta petit *Tullum*, Urbem Episcopalem, unde in Orientem resurgens, *Fruardum* usque versus Aquilonem tendit: visisque Mediomatricibus, Trevirensibus aliisque Populis, ad *Confluentiam*, cui ab re nomen, Rheno confluit. Germanis *Mosel*: Gallis *Moselle*. *Obringos* putatur ab Rhenano, & aliis Ptolemæo dici lib. I. cap. IX. Ioannes tamen Heroldus *Obringon* apud Ptolemæum non Fluvium esse notat, sed designari Tractum eum ad Rhenum, qui nunc temporis *Ober Rhingam* appellatur: Clemens etiam Trelæus Mosellanus testatur ut scribit Abrahamus Ortelius, quendam ad Mosellam Tractum *Obrinci* nomen hætenus retinere. Mosellam singulari doctoque Carmine celebrat Ausonius Eidyll. III ab Aquæ limpidine, Navigandique facilitate: Villis Atriisque, quibus utraque ripa decoratur: Piscibus *Capitone*, *Salari*, *Redone*, *Umbra*, *Barbo*, *Salmonc*, *Mustella*, *Perca*, *Tinca*, *Alburno*, *Alausa*, *Gobio* & *Siluro*, quibus abundat; Fluminibus denique in ipsum decurrentibus *Pronæa*, *Nemesa*, *Sura*, *Gelbi*, *Erubro*, *Lefura*, *Drabono*, *Salmona*, *Saravo*, *Alifontia*. Mosellam & Ararim, facta inter utrumque fossa, connectere, Imperatore Domitio Nerone, adgressus est L. Vetus; ut Copiæ ex Italia per Mare, dein Rhodano & Arare subvectæ per eam fossam, mox fluvio *Mosella* in Rhenum, exin in Oceanum decurrerent: sublatisque itinerum difficultatibus, navigabilia inter se Occidentis Septentrionisq. littora fierent, uti scribit Cornelius Tacitus lib. XII. De hoc Ausonius:

*Te fontes vivique lacus, te cœrula noscent
Flumina: te veteres pagorum gloria luci:
Te Druna, te sparsis incerta Druentia ripis,
Alpinique colent Fluvii, duplicemque per urbem
Qui meat, & dextra Rhodanus dat nomina ripæ.
Te stagnis ego cœruleis, magnumque sonoris
Annubus, equoreæ te commendabo Garumma.*

Saravus, haud procul Salmensibus ortus, Fluviorum omnium qui in *Mosellam* exeunt est maximus: Navigiorum patiens, & aliorum Amnium, quos in se recipit, clarus lustratis urbibus opidisque, quæ vulgo *Sar-Burg*